

Visoki predstavnik organizirao sastanak njemačkih i bosanskohercegovačkih poduzetnika na CEBIT-u

Visoki predstavnik, Christian Schwarz-Schilling, danas je u Hanoveru organizirao i predsjedavao sastankom između bosanskohercegovačkih i njemačkih poduzeća koja se bave informacionim tehnologijama, prvog dana informatičkog sajma CEBIT, jedne od dvije najznačajnije godišnje izložbe kompjuterskih inovacija u svijetu. Svrha sastanka bila je da se iniciraju kontakti između bh. IT sektora i potencijalnih međunarodnih partnera. U toku dana, visoki predstavnik će pratiti delegaciju BiH u obilasku nekih od oko 6000 izlagača predstavljenih na sajmu CEBIT.

U nakoliko posljednjih godina tržište informacionih tehnologija u BiH je doživjelo brz rast, tako da sada postoji oko 300 poduzeća koja rade u ovom sektoru. Mnoga od njih izvoze softverska rješenja u zemlje EU. Dr. Schwarz-Schilling bio je jedan od ko-osnivača CEBIT-a 1986. godine, kada je bio na funkciji njemačkog ministra za telekomunikacije.

“Ključno je da BiH ne propusti pravu priliku koju sada ima na pokretanju bržeg ekonomskog rasta osiguravanjem mjesta u globalnom procesu novih tehnologija”, rekao je visoki predstavnik. “Pokazalo se da su zemlje u tranziciji bolje od zrelih ekonomija u razvijanju novih industrijskih sektora – tako da je ovo oblast u kojoj BiH, u stvari, ima konkurentnu prednost. Ovo je sektor koji preferira mala i srednja poduzeća. Ovo tržište je u procvatu i moramo se postarati da BiH dobije dio toga tržišta”.

Sinoć su visoki predstavnik, ministar saobraćaja i veza BiH Branko Dokić i članovi poslovne delegacije BiH prisustovali zvaničnom otvaranju CEBIT-a. Sajan je otvorila njemačka kancelarka Angela Merkel. Gđa. Merkel je pozvala na uvođenje novih mjera u Njemačkoj da bi se spriječilo da glomazni birokratski aparat otežava investicije i otvaranje novih radnih mjesta u IT sektoru i ukupnom poslovnom okruženju.

“Važno je da poduzetnici iz BiH vide izložbu iz prve ruke”, rekao je dr. Schwarz-Schilling, “jer to će im dati realan uvid u mogućnosti koje postoje. Ako ne znate kakve mogućnosti postoje, onda ne možete ni da ih iskoristite”.